



## Publicaziuns dalla vischnaunca, jamna 50

### Cussegl da vischnaunca

#### Rapport dalla seduta dils 14-12-2018

En sia seduta dils 14 da december 2018 ha il cussegl da vischnaunca sut il presidi d'Armin Manetsch:

- Verificau l'elecziun complementara dalla suprastanza communal dils 25 da november 2018.
- Approbau la revisiun parziala dalla lescha dil dretg da burgheis.
- Acceptau il rapport pertuccont il postulat davart realisar in project d'ina rundella ed in sutpassadi per procurar la segirtad dil traffic d'autos, pedunzs e velocipedists ad Acla da Fontauna.
- Priu enconuschientscha dall'agenda 2019 (termins da sedutas dil cussegl).

Plinavon ha il parlament communal fatg suandontas elecziuns:

#### President e vicepresident dil cussegl da vischnaunca per 2019

Pigl onn 2019 ein vegni eligi Armin Berther sco president e Mario Flepp sco vicepresident.

#### Vicepresident communal per 2019/20

Sco vicepresident communal ei gerau Clemens Berther vegnius eligius.

#### Cumissiu per la revisiun parziala dalla planisaziun locala

Il niev eligi commember dalla suprastanza communal Wendelin Jacomet ei vegnius eligius ella cumissiu preparatoria per la revisiun parziala dalla planisaziun locala.

#### Undraziun

Alla fin dalla seduta ha il president communal undrau gerau e vicepresident communal Iso Mazzetta che sorta la fin 2018 suenter 11 onns e 2 meins cumplein engaschi dalla suprastanza communal. El mereta in grond e sincer engraziament per siu nunstunclenteivel engaschi per il beinstar da nossa vischnaunca.

*Suprastanza communal*

---

#### Referendum facultativ

A caschun da sia seduta dils 14 da december 2018 ha il cussegl da vischnaunca approbau unanimamein la revisiun parziala dalla lescha dil dretg da burgheis. Conform ad art. 21 lit. b dalla constituziun communal ei quella decisiun suttamessa al referendum facultativ. Il messadi davart la revisiun dalla lescha dil dretg da burgheis cun la lescha revedida ein exponi per envesta en casa communal (stanza nr. 10). Enteifer 20 dis dapi la publicaziun ufficiala han 80 votants la pusseivladad d'inoltrar enviers sura conclus il referendum e pretender ina votaziun dil pievel.

*Suprastanza communal*

---

#### Referendum facultativ spiraus

Il 15 da november 2018 ha il cussegl da vischnaunca approbau unanimamein il preventiv 2019 sco era concediu in credit net da frs. 216 000.– per ereger a Sogn Placi ina remisa pil menaschi tecnic. Encunter quellas duas decisiuns ei enteifer il termin fixau buca vegniu fatg diever dil referendum, aschia ch'ellas han contonschiu vigur legala.

*Suprastanza communal*

---



## Cussegl da vischnaunca Elecziun complementara

Il 25 da november 2018 han las votantas ed ils votants da Mustér eligi cusseglier Wendelin Jacomet sco niev gerau. Cheutras sa Wendelin Jacomet buca pli far part dil parlament communal. Per cumpletar il cussegl da vischnaunca pil rest dalla perioda d'uffeci 2017/2020 vegn instradau in'elecziun complementara. La suprastonza communal ha, conform alla lescha davart ils dretgs politics, fixau ils suandonts termins: L'elecziun complementara d'ina commembra ni d'in commember dil cussegl da vischnaunca ha liug **dumengia, ils 10 da fevrer 2019**. Vischinadis, partidas politics localas ni gruppas da silmeins 15 votantas e votants san proponer entochen 30 dis avon l'elecziun candidatas e candidats. Las propostas ein da far a scret e d'inoltrar entochen **gievgia, ils 10 da schaner 2019** all'administraziun communal.

*Suprastonza communal*

---

## Bien di, bien onn

En in mund cun dabia discordia e malgiustia stat la fiasta da Nadal, la naschientscha da Cristus, per ina veta da pasch, solidaritad e humanitad. Nossa vischnaunca dat dapi entgins onns suttetg a fugitivs, persunas scatschadas e persecitadas, persunas che han per part dau si la speranza da saver turnar anavos en lur patria. Con bugen festivassen quels carstgauns en pasch lur Nadal el ravugl da lur famiglias! Co savein nus porscher a quels carstgauns in tec Nadal? Forsa cun schar sentir ch'els ein beinvegni tier nus. Dabia persunas da nossa vischnaunca ein era uonn s'engaschadas per il beinstar da nos fugitivs, per la tgira da malsauns, ella tgira d'affons, famiglias e giuvenils, insumma pil beinstar general da nossa vischnaunca e dil singul convischin. Bugen prendel jeu la caschun d'engraziar da tut cor a tut quellas persunas che s'engaschan di per di per il beinstar da nossa vischnaunca, che fan tut il pusseivel da levgiar il buordi da quels che portan grev. Jeu giavischel a convischinas e convischins sco era a nos hosps bialas e graziusas fiastas da Nadal ed in legreivel e benediu onn niev.

*En num dalla suprastonza communal  
Robert Cajacob, president communal*

---

## Reducziun individuala dallas premias dalla cassa da malsauns 2018

Persunas e famiglias che vivan en relaziuns economicas mudestas san, risguardond certas premissas, dumandar contribuziuns vid las premias dall'assicuranza da basa obligatoria per la tgira da malsauns (LAM). Persunas che han uonn aunc buca fatg diever da quei dretg, san far quei entochen la fin digl onn 2018 (davos termin, datum dil bul da posta 28-12-2018). Informaziuns, basa legala, muossavia ed il formular d'annunzia ein d'anflar sin la pagina d'internet [www.sva.gr.ch](http://www.sva.gr.ch)). Ils formulars san era vegnir retratgs tier l'administraziun communal. Per damondas stat il persunal dall'administraziun communal bugen a disposiziun.

---

## Administraziun communal

### Nadal e Daniev

**Gliendisdis, mardis e mesjamna, ils 24, 25 e 26 da december 2018**

**Gliendisdis, ils 31 da december 2018**

**Mardis e mesjamna, igl 1. da schaner ed ils 2 da schaner 2019**

resta l'administraziun communal mintgamai serrada.  
Nus giavischein ina biala fiasta da Nadal ed in bien e sanadeivel onn 2019!

*Administraziun communal Disentis/Mustér*



## Aperitiv alla midada digl onn

Nus havein il plascher d'envidar la populaziun sco era ils secundindigens (proprietaris da habitaziuns secundaras) dalla vischnaunca Disentis/Mustér ad in aperitiv da Silvester/Daniev sonda, ils 29 da december 2018 naven dallas 16.00 en halla Cons. Igl aperitiv vegn offerius cun sustegn dalla vischnaunca. Ord motivs d'organisaziun essan nus engrazieivels per Voss'annunzia entochen dumengia, ils 16 da december 2018 cun indicar il num ed il diember da personas sut e-mail [event@igzwd.ch](mailto:event@igzwd.ch) ni telefon 076 463 66 61, WhatsApp: 076 463 66 61 In'annunzia ei buc obligatoria e nus selegrein sin stedia participaziun ed in interessant ed inspiront scomi da meinis.

Cuminonza d'interess da proprietaris  
da habitaziuns secundaras  
Interessengemeinschaft  
Zweitwohnungseigentümer Disentis

---

## Controlla da habitonts

### Directivas

Sebasond sin art. 13 entochen 17 dalla lescha cantunala davart ils registers da habitontas e habitonts e davart ulteriurs registers da personas e d'objects, supplichein nus da risguardar suandontas prescripziuns:

### Obligaziun d'annunzia/deponer las scartiras

Tgi che pren domicil en nossa vischnaunca, ha d'annunziar si'arrivada enteifer 14 dis tier la controlla da habitonts Disentis/Mustér. Per l'annunzia ei da deponer il scret da patria ni en cass motivai sco dimorant duront la jamna in attest da domicil. Per personas ch'ein buca da naziunalitad svizra ein il passport ni la carta d'identitad, ina confirmaziun dalla cassa da malsauns svizra e sche gia avon maun, la lubientscha da jasters, necessaris.

### Partenza/midadas d'adresses

Persunas che bandunan nossa vischnaunca ein obligadas d'annunziar lur partenza ordavon cun retrer lur scartiras tier l'administraziun communal. El medem mument ei la retschevida dallas scartiras da returnar. Midadas d'adresa enteifer la vischnaunca ein d'annunziar all'administraziun communal enteifer 14 dis. Questa obligaziun d'annunzia vala era per midar adresa enteifer il medem edifeci.

### Locataris

Locataris da habitaziuns e casas ein obligai d'annunziar mintg'arrivada ni partenza d'affittaders enteifer 14 dis all'administraziun communal.

### Commerci

Tgi che arva ni siara ina fatschenta ni in menaschi commercial ei obligaus d'annunziar quei fatg enteifer 14 dis all'administraziun communal.

### Lubientscha da jasters

Persunas digl exterior ston inoltrar ad uras all'administraziun communal la damonda da prolungir la lubientscha da dimora.

### Formulars

Differents formulars per far las annunzias alla controlla da habitonts anfleis Vus sin nossa pagina d'internet [www.disentis.ch/Downloads/Spurtegl\\_virtual/Controlla da habitonts](http://www.disentis.ch/Downloads/Spurtegl_virtual/Controlla_da_habitonts).

Bien engraziament per Vossa cooperaziun.

*Administraziun communal*

---

## Vischinadi Vitg

Radunonza extraordinaria dil vischinadi ils 7-1-2019  
allas 20.15 en sala da seduta en casa communal. Tractandas:  
propostas per il cussegl da vischnaunca. A stedia  
participaziun envida la suprastonza vischinada vitg.

---



### **Cantar dils Retgs 2019**

Il Sogns Retgs e las Sontgas Reginas dalla tschunavla e sisavla classa da Mustér semettan era uonn sin via per visitar ils habitonts dalla vischnaunca. Els speran d'astgar legrar e delectar biars cun lur viseta e cant. Lur tur entscheivan els mintgamai allas 15.00. Ina gronda part dil recav va en favur dad Urpi-Wasi a Cusco/Peru ed all'acziun Jeder Rappen zählt.

### **gievgia, ils 3 da schaner 2019**

gruppa 1: Carcarola, Davos-Mustér, Via Sursilvana, Suls Orts, Via Cavardiras

gruppa 2: S. Gions, Catins, Raveras, Giudem Cons

gruppa 3: Cuppa, Via Pervenda, Via Dulezi

### **venderdis, ils 4 da schaner 2019**

gruppa 1: Cavardiras, Pardomat, Madernal, Faltscharidas, Sontget

gruppa 2: Mompé-Tujetsch, Via Denterpraus, Buretsch, Quoz, Sax, Acla da Fontauna

gruppa 3: Mompé-Medel, Acletta, Funs, Funs-Dadó, Caschuarz sera cantar el vitget dalla Reka

### **sonda, ils 5 da schaner 2019**

gruppa 1: Disla, Chischliun, Scaletta

gruppa 2: Peisel, Segnas

gruppa 3: Clavaniev, Latis, Cons-su 19.00 cantar duront messa en baselgia a Segnas naven dallas 20.00 cantar en las ustrias

### **dumengia, ils 6 da schaner 2019**

11.00 cantar duront messa a Mompé-Medel

15.00 viseta e cantar ella casa Puntreis

gruppa 1: Via da Scola

gruppa 2: Gonda, Via Sontga Gada

gruppa 3: Cons-sut, Via da Scola

17.00 devoziun en baselgia s. Gions e cantar

18.30 cantar duront messa en baselgia da Nossadunna

---

### **Concert Top Classic 2018**

Venderdis, ils 28 da december 2018 allas 20.00 en Sala Peter Kaiser dalla Claustra Mustér. Il dirigent Simon Camartin organisescha il concert festiv Top Classic 2018 – cun ovras da Händel, Strauss, Mozart, Saint-Saens, Rossini ed auters. Era uonn presenta el cuagl orchester dall'Ucraina INSO Academic Youth Symphony Orchestra L'viv ina sera da musica classica extraordinaria e sin nivel internaziunal. Accumpignau vegn la sera dalla pianista Bogdana-Alexandra Grecova ord la Moldavia cun ina vegliadetga da gest 14 onns. Plinavon astgein nus guder ina dallas vuschs pli vastas ed originalas da nies temps – Christina Daletska, carschida si ella Ucraina. Prevendita ella Papetaria Libreria Andrea alla Via Sursilvana 27 a Mustér ni per telefon 081 936 43 36. Cassa da sera (sch'ei dat aunc tickets) naven dallas 19.00.

---

### **5. fiera da Silvester ad Acletta**

Gievgia, ils 27-12-2018, 15.00–21.00. Fiera cun products indigens, ustria cun gril, vin cauld, punsch, pettas eav. Sentupada per indigens, cussadents e turists da vacanzas. Sin Vossa viseta selegnan

*famiglia Candinas e team*

---



### **Societad da musica Mustér**

#### **Concert da Nadal**

**Sonda ils 22-12-2018**, allas 20.00 en baselgia Sogn Gions a Mustér, silsunter stiva da caffè en halla Cons.  
Entrada libra, collecta.

---

### **Invitaziun Seniors-Ca**

**Gievgia, ils 10 da schaner 2019** allas 13.45 ella Puntreis. Senioras/seniors e la musica cun Simon Camartin.

### **Meisa da miezdi organisada da Seniors-Ca e Puntreis**

Entschatta: allas 12.15 en Puntreis

Gentar cun treis tratgas inclusiv 3 dl aua dalla spina ed in caffè. Annunzia entochen allas 9.00 dil di a Puntreis (tel. 081 929 56 56)